



Broj : 02-05-515/19

Datum, 04.04.2019. godine

ZAPISNIK
sa 25. redovne sjednice 6. saziva Općinskog vijeća Doboj Istok

Dvadesetpeta redovna sjednica 6. saziva Općinskog vijeća održana je dana 30.03.2019. godine u zgradi općine Doboj Istok, u Klokotnici, sa početkom u 10,00 sati.

PRISUTNI: 15 vijećnika, Kemal Bratić, općinski načelnik, Omer Hadžić, sekretar općine, Alirizah Mujkić, pomoćnik općinskog načelnika za poduzetništvo i finansije, Enes Bećirović, pomoćnik općinskog načelnika prostornog uređenja i Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu, Siniša Petrović, predstavnik OSCE-a, Sudina Hadžić i Hatidža Karić, predstavnice Udruženja žena Doboj Istok, Husein Šuvalić, predsjednik Crvenog križa općine Doboj Istok i predstavnik Organizacije demobilisanih boraca općine Doboj Istok, Mehmed Mehinović, predstavnik Organizacije porodica šehida i poginulih boraca općine Doboj Istok, Nermin Mujkić, predsjednik Lovačkog društva „Fazanka“ Doboj Istok, Izet Škrebo, predsjednik Organizacije ratnih vojnih invalida općine Doboj Istok, Semir Mešić, građanin, te predstavnik RTV TK.

ODSUTNI: dr. Ferid Konjić, predsjedavajući Općinskog vijeća i Emira Karić, predsjednica kluba vijećnika SDP.

Sjednicu je otvorio i vodio zamjenik predsjedavajućeg Općinskog vijeća, Sajib Mešić.

Sajib Mešić, zamjenik predsjedavajućeg Općinskog vijeća, je konstatovao da sjednici prisustvuje 15 vijećnika i da su odsustvo najavili Ferid Konjić i Emira Karić.

VIJEĆNIČKA PITANJA I INICIJATIVE

Sajib Mešić, zamjenik predsjedavajućeg Općinskog vijeća, je pitao prisutne imaju li pripremljeno vijećničko pitanje ili inicijativu? Nije bilo prijavljenih.

USVAJANJE ZAPISNIKA SA PRETHODNE SJEDNICE

Sajib Mešić, zamjenik predsjedavajućeg Općinskog vijeća, je pitao ima li neko primjedbi na zapisnik sa prethodne sjednice? Obzirom da nije bilo prijavljenih, zapisnik je dao na glasanje.

Glasanje: ZA – 15, PROTIV – 0, UZDRŽANIH – 0.

USVAJANJE DNEVNOG REDA

Sajib Mešić, zamjenik predsjedavajućeg Općinskog vijeća, je podsjetio vijećnike da su dobili prijedlog dnevnog reda, kao i prijedlog za proširenje dnevnog reda koji se odnosi se na razmatranje zahtjeva Gaudium d.o.o iz Brijesnice Velike za davanje saglasnosti za izgradnju poslovnog objekta na parceli k.č. broj 1770/3 K.O. Mala Brijesnica uz nekategorisani put označen sa k.č. broj 1770/4 K.O. Mala Brijesnica na udaljenosti od 1,00 m od nekategorisanog puta. Zatim je pitao vijećnike ima li neko potrebu nešto da kaže? Pošto nije bilo prijavljenih diskutanata, isti je dao na glasanje:

Glasanje: ZA – 15, PROTIV – 0, UZDRŽANIH – 0.

Zatim je dao na glasanje kompletan dnevni red, s tim da će se dopuna dnevnog reda razmatrati kao zadnja tačka dnevnog reda.

Glasanje: ZA – 15, PROTIV – 0, UZDRŽANIH – 0.

Usvojen je sljedeći:

DNEVNI RED

- 1. Razmatranje i usvajanje nacrtu Odluke o odvodnji i sakupljanju otpadnih voda na području općine Doboj Istok,*
- 2. Razmatranje i usvajanje prijedloga Odluke o učešću u sufinansiranju projekta rekonstrukcija raskrsnice sa semaforizacijom na cesti M4-009 (dionica Doboj – Donja Orahovica, km 8+800) II faza u Klokočnici,*
- 3. Razmatranje i usvajanje prijedloga Odluke o dodjeli mandata novom članu Savjeta MZ Lukavica Rijeka,*
- 4. Razmatranje i usvajanje prijedloga Odluke o visini prosječne konačne građevinske cijene 1 m² korisne površine građevinskog objekta na području općine Doboj Istok,*
- 5. Razmatranje i usvajanje prijedloga Odluke o prodaji neizgrađenog gradskog građevinskog zemljišta putem javnog nadmetanja - licitacije,*
- 6. Razmatranje i usvajanje prijedloga Rješenja o imenovanju Komisije za sprovođenje javnog nadmetanja – licitacije za prodaju neizgrađenog gradskog građevinskog zemljišta,*
- 7. Razmatranje i usvajanje Izvještaja o radu općinskog načelnika za 2018. godinu,*
- 8. Razmatranje i usvajanje Izvještaja o rješavanju upravnih stvari u upravnom postupku u općini Doboj Istok za 2018. godinu,*
- 9. Razmatranje i usvajanje Izvještaja udruženja građana o utrošku dodijeljenih budžetskih sredstava za 2018. godinu sa završnim računom,*
- 10. Razmatranje i usvajanje Informacije o provedenim aktivnostima povodom obilježavanja Dana nezavisnosti BiH i Dana Općine,*
- 11. Razmatranje prijedloga upisa učenika u I razred srednje škole u školskoj 2019/2020. godini u JU MSŠ Doboj Istok,*
- 12. Razmatranje zahtjeva Mešić (Muhameda) Emira iz Brijesnice Male za davanje saglasnosti susjeda,*
- 13. Razmatranje zahtjeva Gaudium d.o.o iz Brijesnice Velike za davanje saglasnosti za izgradnju poslovnog objekta na parceli k.č. broj 1770/3 K.O. Mala Brijesnica uz nekategorisani put označen sa k.č. broj 1770/4 K.O. Mala Brijesnica na udaljenosti od 1,00 m od nekategorisanog puta*

REALIZACIJA DNEVNOG REDA

Ad. 1. Razmatranje i usvajanje nacrtu Odluke o odvodnji i sakupljanju otpadnih voda na području općine Doboj Istok.

Sajib Mešić, zamjenik predsjedavajućeg Općinskog vijeća, je dao tačku na diskusiju.

Selmin Karić, vijećnik SDA, je pozdravio ovu odluku koja će imati veliki značaj za građane obzirom da u postupku izgradnje objekata potrebno je pribavljati vodna akta i to prethodnu vodnu saglasnost, vodnu saglasnost i vodnu dozvolu. Nada se da će i prijedlog odluke ubrzo doći na Vijeće.

Sajib Mešić, zamjenik predsjedavajućeg Općinskog vijeća, je dao prijedlog Odluke na glasanje.

Glasanje: ZA – 15, PROTIV – 0, UZDRŽANIH – 0.

Ad.2. Razmatranje i usvajanje prijedloga Odluke o učešću u sufinansiranju projekta rekonstrukcija raskrsnice sa semaforizacijom na cesti M4-009 (dionica Doboj – Donja Orahovica, km 8+800) II faza u Klokotnici.

S obzirom da nije bilo prijavljenih diskutanata Sajib Mešić, zamjenik predsjedavajućeg Općinskog vijeća, je dao prijedlog Odluke na glasanje.

Glasanje: ZA – 15, PROTIV – 0, UZDRŽANIH – 0.

Ad.3. Razmatranje i usvajanje prijedloga Odluke o dodjeli mandata novom članu Savjeta MZ Lukavica Rijeka,

S obzirom da nije bilo prijavljenih diskutanata Sajib Mešić, zamjenik predsjedavajućeg Općinskog vijeća, je dao prijedlog Odluke na glasanje.

Glasanje: ZA – 15, PROTIV – 0, UZDRŽANIH – 0.

Ad.4. Razmatranje i usvajanje prijedloga Odluke o visini prosječne konačne građevinske cijene 1 m² korisne površine građevinskog objekta na području općine Doboj Istok,

S obzirom da nije bilo prijavljenih diskutanata Sajib Mešić, zamjenik predsjedavajućeg Općinskog vijeća, je dao prijedlog Odluke na glasanje.

Glasanje: ZA – 15, PROTIV – 0, UZDRŽANIH – 0.

Ad.5. Razmatranje i usvajanje prijedloga Odluke o prodaji neizgrađenog gradskog građevinskog zemljišta putem javnog nadmetanja - licitacije,

S obzirom da nije bilo prijavljenih diskutanata Sajib Mešić, zamjenik predsjedavajućeg Općinskog vijeća, je dao prijedlog Odluke na glasanje.

Glasanje: ZA – 15, PROTIV – 0, UZDRŽANIH – 0.

Ad.6. Razmatranje i usvajanje prijedloga Rješenja o imenovanju Komisije za sprovođenje javnog nadmetanja – licitacije za prodaju neizgrađenog gradskog građevinskog zemljišta,

S obzirom da nije bilo prijavljenih diskutanata Sajib Mešić, zamjenik predsjedavajućeg Općinskog vijeća, je dao prijedlog Rješenja na glasanje.

Glasanje: ZA – 15, PROTIV – 0, UZDRŽANIH – 0.

Ad.7. Razmatranje i usvajanje Izvještaja o radu općinskog načelnika za 2018. godinu,

S obzirom da nije bilo prijavljenih diskutanata Sajib Mešić, zamjenik predsjedavajućeg Općinskog vijeća, je dao Izvještaj na glasanje.

Glasanje: ZA – 9, PROTIV – 0, UZDRŽANIH – 6.

Ad.8. Razmatranje i usvajanje Izvještaja o rješavanju upravnih stvari u upravnom postupku u općini Doboj Istok za 2018. godinu,

S obzirom da nije bilo prijavljenih diskutanata Sajib Mešić, zamjenik predsjedavajućeg Općinskog vijeća, je dao Izvještaj na glasanje.

Glasanje: ZA – 15, PROTIV – 0, UZDRŽANIH – 0.

Ad.9. Razmatranje i usvajanje Izvještaja udruženja građana o utrošku dodijeljenih budžetskih sredstava za 2018. godinu sa završnim računom,

S obzirom da nije bilo prijavljenih diskutanata Sajib Mešić, zamjenik predsjedavajućeg Općinskog vijeća, je dao Izvještaj na glasanje.

Glasanje: ZA – 15, PROTIV – 0, UZDRŽANIH – 0.

Ad.10. Razmatranje i usvajanje Informacije o provedenim aktivnostima povodom obilježavanja Dana nezavisnosti BiH i Dana Općine,

S obzirom da nije bilo prijavljenih diskutanata Sajib Mešić, zamjenik predsjedavajućeg Općinskog vijeća, je dao Informaciju na glasanje.

Glasanje: ZA – 15, PROTIV – 0, UZDRŽANIH – 0.

Ad.11. Razmatranje prijedoga upisa učenika u I razred srednje škole u školskoj 2019/2020. godini u JU MSŠ Doboj Istok,

Sajib Mešić, zamjenik predsjedavajućeg Općinskog vijeća, je dao tačku na diskusiju.

Fajik Muratović, vijećnik SDP, je mišljenja da se konstantno upisuju jedna te ista zanimanja, te smatra da bi se trebale napraviti izmjene u srednjoj školi koje će se prilagoditi privredi i potrebama privrede. Predlažem da se u narednom periodu pokuša to izbalansirati, jer ima dosta vozača i automehaničara, pa će se doći u situaciju da će djeca otići u druge općine. Sugerishe da se pokuša stupiti u kontakt sa udruženjem iz Gračanice koji su zainteresovani za određena zanimanja i da u skladu sa tim treba pripremiti stručni kadar u našoj školi koji će školovati kadar koji će se odmah zaposliti.

Sajib Mešić, zamjenik predsjedavajućeg Općinskog vijeća, je napomenuo da nema direktora škole da objasni o čemu se radi.

Semir Halilović, vijećnik SDA, je naveo da će on pokušati objasniti kako bi direktoru dao vremena da dođe, s obzirom da je ovo među zadnjim tačkama, pa je mislio da je duže trajati sjednica. Napomenuo je da o ovom problemu razgovaraju s obzirom da je svake godine na dnevnom redu, da je škola uradila maksimalno i da je ovo odabir zanimanja koja se traže na tržištu sa raspoloživim kadrom koji ima škola. Podsjetio je da uvođenje novog zanimanje traži nove elaborate i saglasnost ministarstva, ali da je tačno da ako nema zeleno svjetlo od privrednika da treba uvesti nova zanimanja. Treba imatu vidu da je škola mala i da se bavi sa onim što raspolaže i smatra da je dobra upisna politika u školi, jer treba analizirati i druge škole gdje ostaju učionice prazne. Naša škola nema problema sa upisnom politikom, jer je daleko ispod onog pedagoškog minimuma. Na tržištu je jedna ponuda, ali je ovo ono što žele djeca i roditelji da mogu dobiti 5 – 6 odjeljenja sa 100 djece. Postoje mnoga poželjna zanimanja kao medicina, ali naša općina neće nikada imati medicinsku školu, jer nema bolnice. Tehničar elektroenergetike - tu nema problema sa upisom, jer to djeca žele. Smatra da je normalno da treba učiti i doškolovavati se i da je lakše tehničaru usmjeriti se na zanimanje nego obrnuto. Jako je bitno da zadrže 4 nego 3 godine, jer bolji učenici upisuju tehnička zanimanja. Gimnazija se školuje za visoko obrazovanje i škola može obezbijediti ove uslove. Poljoprivredni tehničari nam trebaju, a vozači se zapošljavaju jako dobro i ne zna koliko ih trenutno ima na Birou, ali zna da se zapošljavaju. Krojač – tekstilna škola to je što naše tržište traži, jer su dobili preporuke od privrednika da njima treba krojača. Građevinske struke ne žele da upisuju djeca, jer tako roditelji biraju. Ako bi bio medicinski tehničar, onda ne bi bilo gimnazije, jer odlični učenici moraju upisati ili gimnaziju ili medicinsku školu, jer nemamo toliko odličnih. Vjeruje da nije problem da se dođe u školu i da se vidi kako se radi. Broj 1. su roditelji i učenici i njihova je zadnja, a privrednici mogu govoriti šta hoće. Smatra da ako želimo da se kvalitetno pripremimo za ovu tačku da ne bi bilo loše da se dođe u školu i da se vidi šta se radi na upisnoj politici.

Kemal Bratić, općinski načelnik, je naveo da je profesor uzeo njegovu diskusiju, jer su zanimanja pod 4, 5 i 6. ono što naša privreda traži i da menadžment škole zajedno sa nastavnicima zna šta su atraktivna

zanimanja. Ono što njega posebno raduje kao općinskog načelnika je što nema opadanja broja učenika, jer smo imali konstantno opadanje i govorili smo da pokušamo sačuvati srednju školu i uspjeli smo u tome. Posebno mu je drago što je u stalnom porastu broj učenika koji se upisuju našu srednju školu, jer ako se zna da je u stalnom opadanju broj rođene djece moramo biti zahvalni. Napominje da i njegovo dijete pohađa gimnaziju i ide u našu školu i da mu je posebno drago što dosta te djece upisuju i završavaju fakultete. Čestitao je srednjoj školi na dosadašnjim rezultatima, kao i osnovnim školama koje ih u stopu prate, da nastave tim tempom, da nastave sa prezentacijom naše srednje škole i da u narednom periodu bude upisan još veći broj učenika u prve razrede.

Fajik Muratović, vijećnik SDP: „Ja sam se dvoumio da li da izađem ili da ne izađem, jer sam znao da me neće razumjeti u potpunosti. Ja sam svaki puta izvještaj srednje škole pohvaljivao, jer znam da dobro rade. Ja imam nešto što menadžment nema, a to je kontakt sa tim ljudima, sa tržišnom ekonomijom i tržištem. Tržište se svake godine mijenja i nove su potrebe. Ja sam rekao ovo je u redu podržat ću, samo što sam rekao da se za budućnost moramo pripremati. Nisu sva djeca spremna obrazovno iz osnovne škole da mogu nastaviti tehnička zanimanja. Gubimo godinu dana školujući dijete za četiri godine da bi radio kao majstor, a mora privrednik ponovo prekvalifikaciju vršiti na njemu i potrošiti dio svog vremena i sredstava za to. Ja iz tog ugla gledam. Za ubuduće da pokušamo svake godine nešto novo da ubacimo, pa da planiramo ili predlažem, kako hoćete, postoji IT gimnazija jako atraktivna danas i postoji dosta atraktivnih zanimanja građevinske struke. Znam da je teško u školi, ali da se pokuša nešto. Elektrotehnička škola – svi profesori mogu raditi i za instalatera, za mehaničara, pogonskih električara, rukovaoca električnim mašinama, jer to je isto. Praksa se može obezbijediti, ja sam u kontaktu sa ljudima i neke učenike i uzimam na praksu. Prije sam imao sa Gračanicom, a sada sam se prebacio ovdje na našu ustanovu i hoću sa njima da radim. Ova zanimanja ovdje su dosta dobra, ali da svake godine ubacimo po jedno zanimanje. Roditelj uzme papir i pogleda šta škola ima i normalno da će nešto zaokružiti. Ja nisam izašao da kritikujem, samo sam pokušao da pomognem, jer se tržište mijenja. Ja radim sa 250 firmi i firme vrše preorijentaciju. Sada trenutno oko 50 firmi vrši preregistraciju i preorijentaciju svojih poslova, pa da mi to preduprijedimo i da vidimo sa njima, a u kontaktu sam sa Sejom Terzićem, sa nekim ko je zadužen za to, kuda se te firme preorijentišu da i mi možemo učenike školovati za to. To je bila moja namjera, ali ako to ne valja što sam ja rekao, ja povlačim sve.“

Kemal Bratić, općinski načelnik: „Ja sam vas sasvim razumio, a mislim da vi ne razumijete upisnu politiku. Znači ne možemo mi ako imamo tri učenika zainteresovana za nešto napraviti odjeljenje. Mi baratamo sa cifrom oko 100 učenika i ne možemo pet učenika za zidare, pet učenika za bravare, ali da Bogdom možemo to bi bilo idealno. Međutim, ne može. Da imamo 1000 učenika ko ne bi napravio da ima izbor, isto kao kad uđete u trgovinu gdje imate tri artikla ili uđete gdje imate 1000. To je ogromna razlika. Ja vama govorim da postoje procedure prije svega davanje saglasnosti i broj učenika. Ako mi raspoložemo sa 100 učenika, otprilike pola pola dječaci i djevojčice, moramo i o tome voditi računa. Veoma je lako reći hajmo, međutim postoje procedure ili ono što je najbitnije broj učenika. Mi imamo 100 učenika svake godine koje upišemo i treba da molimo Boga da tako ostane. Ništa drugo.“

Admir Dautiović, direktor JU Mješovita srednja škola Doboj Istok: „Uvaženi načelnice, dopredsjedavajući, vijećnici, gospodo iz medija, uvaženi gosti selam alejkum i dobar dan. Profesor Semir Halilović i općinski načelnik su dali malu analizu upravo ono što bih i ja htio da kažem i vidi se da dolaze iz obrazovanja i razumiju problematiku. Napraviti ću jednu malu analizu dosadašnjeg upisa u našu srednju školu, mali uvod. Vi svi znate iz godine u godinu da se ponavljamo ovdje za govornicom. 2013. godine škola je imala 13 odjeljenja i bila je ispod minimuma za opstanak mješovitih škola, a to je broj od 14 odjeljenja. Srednja škola nakon četiri godine ima 19 odjeljenja i mi smo jedina škola u Kantonu, a mogu slobodno reći i u Federaciji, koja ima tendenciju rasta učenika. Mi za ove četiri godine, ne mogu reći da je to samo zahvaljujući meni, nego svim uposlenicima i školskom odboru lokalne zajednice, povećali za 80 učenika. To nije malo. Ne bi to povećali da nismo imali dobar plan upisa, vjerujte mi. Mi moramo imati ove tehničke škole i ova zanimanja. O gimnaziji nema rasprave, jer je to naša tradicija u koju dolaze dobri učenici koji završavaju fakultete. Dosta doktora radi u našem Domu zdravlja koji su završili našu gimnaziju. Poljoprivredno prehrambena škola - imamo jedno odjeljenje i ponovo ga upisujemo, a vodimo se tom politikom da će se u Doboj Istoku, ako Bog da, jer imamo neke informacije, ponovo pokrenuti Vegafruit gdje ti radnici mogu da rade. Elektrotehnička škola - to su učenici koji faktički prate gimnaziju sa dobrim rezultatima, idu na fakultete, a mogu se brzo zaposliti. Neki dan smo ja i profesor Halilović

obavili razgovor sa direktorom firme Urban koji će uzeti naših pet učenika i odmah ih zaposliti. Zatim ekonomska škola imamo upis i interes roditelja za tom školom. Ne možemo mi reći nećemo ekonomsku školu kada se pojavi u anketi 15 – 16 učenika koji žele da upišu u tu školu. Kada su u pitanju ove kombinacije to su stručna zanimanja. Mi smo općina koja je prepoznatljiva po saobraćaju i imamo možda najveću firmu za prevoz transporta. Po mom podatku na Birou ima dva vozača koji su stariji i koji nisu u radnom odnosu. Automehaničari – imamo treći razred koji završava i njih ima ukupno 13. Od njih 13 svi su na praksi i od njih 9 radi kod privatnika i svih 9 dobit će stalni ugovor čim završe za dva mjeseca školu, a neki već imaju stipendiju. Znači tu smo pogodili sa tim upisom. Kada su u pitanju krojači iz godine u godinu mi imamo odjeljenje krojača i vodimo se tom politikom da imamo najveću fabriku tekstila možda u državi i još par pratećih firmi koje rade manje obrte i svi oni rade. Iz Sumana imamo poziv da odmah djeca idu raditi. Znači ne možemo reći da nismo napravili dobar upis. Trgovci – opet nam trebaju trgovci. Ja razumijem da trebaju nova zanimanja, ali da bi uradili nova zanimanja moramo proći javnu tematsku raspravu ovdje na Vijeću, pa moramo napraviti uslove, jer mi nismo velika škola mi smo nastali iz rata. Naša škola i Doboj Istok su plaćeni životima i dijelima tijela naših boraca. Tako je i srednja škola nastala u najtežim uslovima i stvarala se iz pepela. 25 godina postoji i ovo što ima dobro je, ali može uvijek bolje. Hoću da kažem da moramo napraviti uslove, moramo imati dobre prostorije za praktičnu nastavu kao zavarivači, a to je skupo zanimanje, a imamo tri učenika koji treba da se upišu u zavarivače. Na Kantonu kada su u pitanju građevinske struke, stručna zanimanja, u građevinsku školu u Tuzli upisano je u četiri kombinacije ukupno 14 učenika ili čak i manje zidar, tesar, armirač i keramičar. Većina djece ako i malo hoće, hoće da idu u tehnička i druga zanimanja. Medicinska škola još uvijek drži taj nivo, a mi ne možemo imati medicinsku školu, a rekao je i profesor Halilović iz više razloga. Prvo nemamo uslove, jer treba bolničko liječenje, odnosno praksa, nemamo bolnicu koja će to sve da pokrije, a druga stvar vjerovatno bi izgubili gimnaziju, jer moramo pripremiti kabinet za praktičnu nastavu medicinske škole, a nemamo veliki prostor, mi smo manja škola. Po broju učenika smo na Kantonu među 10 škola i to znam sigurno. Mislim da je ovaj plan upisa izuzetno dobar koji je prošao i nastavničko vijeće i školski odbor, a prošao je i anketu u osnovnim školama od Sjenine Rijeke do Stjepan Polja, sa dobrom prezentacijom, dobrom promocijom i razgovorom sa roditeljima. Ja pozivam sve vas vijećnike da se uključite zajedno sa nama kada budemo išli u promociju škole. Ja se ovdje moram zahvaliti Senadi Džanić koja obnaša funkciju direktora OŠ „Klokotnica“ koja je dala najveću podršku kod upisa kod razgovora sa roditeljima. Njoj se u ime menadžmenta škole zahvaljujem, ali i svima vama vijećnicima koji smatrate da trebate pomoći izvolite i pridružite nam se kada budemo radili promociju škole, kada puštamo promotivni film, razgovaramo sa roditeljima od Sjenine Rijeke do Stjepan Polja, pa čak idemo i u Područnu školu Donja Lohinja i u Donju Orahovicu, jer se možda neko bude zainteresovao za našu školu. Znači radimo sve što možemo uraditi. Kada smo imali razgovor u OŠ „Lukavica“ i tamo nas je direktor lijepo ugostio i sa nama zajedno radio. Iako dolazimo iz druge općine pomogao nam je kod upisa naših učenika i mi imamo oko 13 učenika koji dolaze iz Lukavice. Ovaj dio učenika koji odlazi iz Doboj Istoka u Gračanicu ili Doboj, dolaze kod nas iz Republike Srpske iz Svjetliče, iz Suhog Polja, iz Doboja, čak imamo učenika iz Kotorskog, dolaze nam učenici iz Grapske, imamo dosta učenika iz Sjenine Rijeke, čak i iz Stjepan Polja tako da mi nekako opet uspijemo. Plan ove godine je 5, eventualno 6 odjeljenja, tako da zadržimo ovaj nivo od 18 – 19 odjeljenja.“

Sajib Mešić, zamjenik predsjedavajućeg Općinskog vijeća: „Zahvaljujem direktoru. Da li još neko želi po ovoj tački? Ne želi, zahvaljujem. Opšti utisak javnosti je da se direktor i menadžment škole jednostavno hrvu i bore se u ovom kakvo je trenutno socijal ekonomsko stanje u državi i na Kantonu i da postižu dobre rezultate. Najbitnije je da prate sve te standarde i da se broj djece ne smanjuje, jer će samim tim to dati određenu sigurnost da će ta škola postojati, jer je to potreba svih nas. Ko je za ovakav prijedlog upisa učenika u prvi razred srednje škole?“

Glasanje: ZA – 15, PROTIV – 0, UZDRŽANIH – 0.

Konstatujem da je prijedlog usvojen jednoglasno.“

Ad.12. Razmatranje zahtjeva Mešić (Muhameda) Emira iz Brijesnice Male za davanje saglasnosti susjeda,

Sajib Mešić, zamjenik predsjedavajućeg Općinskog vijeća: „Vidjeli ste o čemu se radi. Da li neko želi diskutovati? Ne želi, zahvaljujem. Ko je za?”

Glasanje: ZA – 14, PROTIV – 0, UZDRŽANIH – 1.

Konstatujem da je tačka dobila potrebnu većinu.“

Ad.13. Razmatranje zahtjeva Gaudium d.o.o iz Brijesnice Velike za davanje saglasnosti za izgradnju poslovnog objekta na parceli k.č. broj 1770/3 K.O. Mala Brijesnica uz nekategorisani put označen sa k.č. broj 1770/4 K.O. Mala Brijesnica na udaljenosti od 1,00 m od nekategorisanog puta.

Sajib Mešić, zamjenik predsjedavajućeg Općinskog vijeća: „Stavljam tačku na diskusiju, izvolite. Zahvaljujem. Ko je za?”

Glasanje: ZA – 14, PROTIV – 0, UZDRŽANIH – 1.

Konstatujem da je tačka dobila potrebnu većinu. Zahvaljujem vam se na saradnji, zatvaram sjednicu.“

Sjednica je završena u 10,45 sati.

ZAPISNIČAR
Behara Hadžić

SEKRETAR
Omer Hadžić

ZAMJENIK PREDSJEDAVALJUĆEG
OPĆINSKOG VIJEĆA
Sajib Mešić

Službena zabilješka:

Zapisnik je usvojen na 26. redovnoj sjednici Općinskog vijeća Doboje Istok održanoj dana 27.04.2019. godine.

U Klokotnici, dana 29.04.2019. godine

Zabilješku sačinio
Omer Hadžić, sekretar Općine